



INATSIARTUT

## INATSIARTUNI

### Sulineq pillugu tusagassiortunut najoqqutassiaq

#### ATTAVEQARFISSAQ

Taaguutit sulinermilu pissutsit pingaarutillit Inatsisartunut attuumassuteqartut pillugit mappersakkakut ugguuna tusagassioffinnut paasissutissiinissaq Inatsisartut Allattoqarfiannit kissaatigineqarpoq.

Inatsisartoqarnikkut sulineq pillugu paasissutissanik tusagassioffiit siammarterinerannut siuarsaataasinnaasunik pissarsiniartoqartillugu allatulluunniit ikiorneqarnissamik kissaateqartoqartillugu Allattoqarfiup tusagassiortunit qaqukkulluunniit saaffigineqarsinnaanissaa Allattoqarfimmit kissaatigineqarpoq. Taamaattorli saaffiginninnginnermi Inatsisartut nittartagaata [inatsisartut.gl](http://inatsisartut.gl)-ip alakarneqartarnissaa siunnersuutigineqarpoq, tassani atortussat attuumassutillit sapinngisamik piaarnerpaamik saqqummiunneqartarput.

Allattoqarfimmut ugguuna saaffiginnittoqarsinnaavoq: [inatsisarut@inatsisartut.gl](mailto:inatsisarut@inatsisartut.gl), oqarasuaat +299 34 50 00. Inatsisartut aamma ugguuna saaffigineqarsinnaapput: [lkri@inatsisartut.gl](mailto:lkri@inatsisartut.gl), ooqarasuaat +299 34 61 20.

#### ULLOQ TUNNIUSSEREERFISSAQ

Inatsisartut ataatsimiinnerisa aallartinnissaat sapaatip akunnerinik tallimanik sioqqullugu tunniussisoqariissaaq. Ukiakkut ataatsimiinnerit septemberip

qiteqqunnerani nalinginnaasumik aallartittarput, Inatsisartulli piffissamik allamik aalajangiisinnaapput. Upernaakkut ataatsimiinnerup aallartinnissanut ukiumi pineqartumi poorskip qanoq inissisimanagera nalinginnaasumik apeqquataasarpoq.

#### OQALUUSERISASSAT QAQUGU TAKUSINNAAVAGUT?

Siunnersuutit nassiunneqartut (nalunaarutiginninnermik oqaatigineqartartut) tunniussinissamut killiliussap qaangiunnerani Inatsisartut Allattoqarfianit Siulittaasoqarfimmillu misissorneqartarput. Siunnersuutit iluserisassaannut imarisassaannullu piumasaqaatit (ilusiliinissamut piumasaqaatinik taaneqartartut) eqquutsinneqarsimanersut Siulittaasoqarfiup immikkut nalilersugassaraa.

Ilusiliinissamut piumasaqaatit ilaatigut Inatsisartut suleriaasianni aammalu naalakkersuinnikkut sulinermit aningaasatigut tapiissuteqartarneq pillugu inatsimmi allassimapput uanilu takuneqarsinnaallutik; [inatsisartut.gl/ataatsimiinnerit](http://inatsisartut.gl/ataatsimiinnerit). Kiisalu ilusiliinissamut piumasaqaatinik arlalinnik teknikkimut tunngassuteqarnerusunik (soorlu naqinnerit suut atorneqarnissaannut, titarnerit akunnerinut il.il. tunngassuteqartunik) Siulittaasoqarfik nammineq aalajangersaasarpoq. Inatsisartut aalajangiinissaminut naammattumik assigiiartumillu tunngavissaqarnissaannik qulakkeerinninnissaaq ilusiliinissamut

piumasaqaatit pingaarnertut  
siunertaraat.

Tamatuminnga suliaqarneq sapaatip  
akunneranik ataatsimik  
sivisussuseqarajuppoq, tamatuma  
kingorna ataatsimiinnissami aggersumi  
oqaluuserisassat Siulittaasoqarfimmit  
tamanut saqqummiunneqartarput.

Oqaluuserisassat piareeraangata  
tusagassiorfinnut soqutigisaqartunullu  
allanut nassiunneqartarput. Ilutigalugulu  
tamanna pillugu tusagassiorfinnut  
nalinginnaasumik  
nalunaaruteqartoqartarluni.

### OQALUUSERISASSANIK ALLANNGUINERIT

Inatsisartut ataatsimiinnerini  
oqaluuserisassat ingerlaavartumik  
allanngortinneqartarput. Inatsisartut  
ataatsimiititaliaasa  
isumaliutissiissusiaminnik  
naammassiniaallutik piffissamik  
annertunerusumik pisariaqartitsinerat  
imaluunniit pissutsit avataaneersut  
assersuutigalugu soqutigisaqatigiit  
paasissutissanik pingaarutilinnik  
nutaanik saqqummiinerat taamatut  
allanngortitsinermut ilaatigut  
pissutaasinnaasarpoq.

Oqaluuserisassat allannguutaat  
Inatsisartut nittartagaatigut tamanut  
saqqummiunneqartarput kiisalu  
soqutigisaqartunut e-mailikkut  
nassiunneqartarput. Mailikkut  
nassinneqartussat allattorsimaffiannut  
ilanngunneqarnissamik saaffiginnissut  
uunga nassiunneqassaaq; [lkri@ina.gl](mailto:lkri@ina.gl).

### ATAATSIMIINNERIT AMMASUT MATOQQASULLU

Inatsisartut ataatsimiinneri aallaavittut  
ammasuupput. Suleriaaserli

naapertorlugu isumaqatigiinniarnertit  
aalajangersimasut matoqqasumik  
ingerlanneqartarput. Tassa  
isumaqatigiinniarnertit taakku tamanit  
tusagassiortunillu  
najuuffigineqarsinnaanngillat.  
Tamatumani immikkut pineqarput  
isumaqatigiinniarnertit  
siunnersuisoqatigiinnut  
aalajangiisartutullu ataatsimiititalianut  
ilaasortassanik toqqaaffiusut imaluunniit  
nersornaasiinissamut  
akissarsititsinissamullu  
tunngassuteqartut.

Ataatsimiinnerup matoqqasup  
aallartilernerani ataatsimiinnerup  
matuneqalernera ataatsimiinnermik  
aqutsisup nalinginnaasumik  
nalunaarutigisarpaa.  
Taamaattoqartillugu inuit najuuttut  
tusagassiortullu ataatsimiittarfik  
ingerlaannartumik qimassavaat.

### ISSIAVIIT IMMIKKUT INNIMINNIKKAT

Tusagassiorfiit sinniisaat ataatsimiittarfimmi  
arlalialunnik immikkut  
inissaqartinneqarnissaminnut  
periarfissinneqarput. Tamanna pillugu  
saaffiginnissuteqartoqartillugu issiaviit  
pineqartut tusagassiorfiit aallartitaannit  
immikkut atugassanngorlugit  
inniminnigaaneri Allattoqarfimmit  
ersarissumik allagarserneqassapput.  
Tamanna pillugu saaffiginnissutit mailikkut  
ukununnga nassiunneqassapput,  
taamaattorli tusagassiortunut  
ataasiakkaanut tusagassiorfikkaarlugu  
inissaq ataasiinnaq  
innersuussutigineqarsinnaavoq;  
[inatsisartut@inatsisartut.gl](mailto:inatsisartut@inatsisartut.gl) [aammaivjo@inatsisartut.gl](mailto:aammaivjo@inatsisartut.gl).

### ATAATSIMITTARFIMMI ASSILIINERIT FILMILIORNERILLU

Ataatsimiittarfik tusagassiortut kisimik  
sulliviginngilaat aammali inatsisiliortut  
sullivigaat. Taamaammallu Inatsisartut

eqqissillutik tusagassiorfinnilu sulisunit najuuttunit akornusersorneqaratik sulisinnaanissaat pingaaruteqarpoq. Taamaammat isumaqatigiinniarnert ingerlanneqarnerisa nalaanni ataatsimiittarfimmi assiliinerit filmiliornerillu ataatsimiittarfimmi tusarnaartunut inissat eqqaanni taamaallaat pisinnaapput.

Taamaattorli ataatsimiinnerup ammarnernit tamatumalu kingorna minutsini tallimani siullerni assiliisartut filmiliorullu piffinni allani assiliillutillu immiussisinnaapput, tamanna Inatsisartut sulinerannut akornusersuutaanngitsumik pippat.

Inatsisartut ataatsimiittarfianni tattoqisaattoqartillugu assiliiviit niuluinik pingasunik niutalinnik ataatsimiittarfimmut eqqussisoqassanngilaq; taamaattoqarnerani taamaallaat tigungmiartakkanik atortoqarluni immiussisoqarsinnaassaaq.

Qaqugukkulluunniit oqaluttarfik pallinneqassanngilaq.

Tusagassiorlut inersuarmi pissusilersornerat akornusersuutaasutut ataatsimiinnermik aqutsisup nalileruniuk sukkulluunniit uparuarsinnaavaa. Taamaattoqartillugu peqqussutigineqartoq tusagassiorlut piaartumik malissavaat.

Tusagassiorlut tamatuma saniatigut paarsisut (betjentit) innersuussutaannik malinnittassapput. Immiussinissamik immikkut pisariaqartitsisoqartillugu piffissaalluartillugu kingusinnerpaamillu nalunaaquttap akinnerinik 48-nik sioqqutsilluni Allattoqarfimmut saaffiginnittoqarsinnaavoq, taassumalu kissaatigineqartoq Siulittaasoqarfimmut saqqummiutissavaa. Uunga saaffiginnittoqassaaq; [inatsisartut@inatsisartut.gl](mailto:inatsisartut@inatsisartut.gl) assilineralu uunga nassiunneqassalluni; [lkri@inatsisartut.gl](mailto:lkri@inatsisartut.gl).

Allattoqarfiup sulisui immikkut atugassaqartitaapput siuliani allassimasunit allaanerusinnaasunik.

## INI PAASISSUTISSIISARFIULLUNILU TUSAGASSIORTUNUT SULLIVIUSSOQ

Inimik paasissutissiisarfiullunilu tusagassiorlut sulliviusumik, tusagassiorfiit aallartitaannit soqutiginnittunilluunniit allanit atorneqarsinnaasumik, Allattoqarfik atugassiisuteqarpoq. Ini tusagassiorlut allattunit suliffittut atuutiinnarani aammali radioqarfiit TV-qarfiillu apersuiviattut atuutissaaq.

Apersuinerit torsuusani allaniluunniit Inatsisartunit kiisalu Allattoqarfimmi partiinilu suleqataasunit suliffittut atuuffeqartuni sapinngisaq naapertorlugu pisassanngillat.

Atortulersuutit inimi inissinneqarsimasut qajassuunnissaannik inussiarnersumik qinnuigineqarput.

## ATAATSIMIINNERUP AVATAATIGUT ATAATSIMIITTARFIMMI TV-MUT IMMIUSSINERIT

### AALLAKAATITSINERILLU

Ataatsimiittarfimmi isumaqatigiinniarnert avataanni TV-mut immiussinissamik aallakaatitsinissamilluunniit kissaateqartoqarpat, tamanna pillugu Allattoqarfimmut isumaqatigiisuteqartoqarsinnaavoq.

Immiussinissaq sioqqullugu piffissaalluartillugu Allattoqarfimmut saaffiginnissimanissaq taamatut isumaqatigiisuteqarnissamut piumasaqaataavoq. Uunga saaffiginnittoqassaaq; [inatsisartut@inatsisartut.gl](mailto:inatsisartut@inatsisartut.gl) assilineralu uunga nassiunneqassalluni; [lkri@inatsisartut.gl](mailto:lkri@inatsisartut.gl)

## PISORTAT INGERLATSINERAT PILLUGU

### PAASITINNEQARSINNAATITAANEQ

Inatsisartut taakkulu allattoqarfiat  
Inatsisartut Ombudsmand-iattulli pisortat  
ingerlatsinerat pillugu  
paasitinneqarsinnaatitaaneq pillugu  
Inatsisartut inatsisaannut  
ilaatinneqanngillat.

Tamatumunnga pissutaavoq Inatsisartut  
taaguummumut "pisortat ingerlatsinerannut"  
ilaatinneqanngimmata. Pisortat  
ingerlatsinerat allaffissornikkulluunniit  
aqutsinerat suliassaqarfittut  
ingerlatsivittulluunniit inatsisiliornerit  
tunngavigalugit innuttaasunik  
sullissiviusutut innuttaasullu ulluinnarni  
inuuneranut sunniuteqarsinnaasunik  
aalajangiiviusartutut paasineqassaaq,  
Inatsisartullu sulinerat sullinneqarnerallu  
tassunga ilaasutut  
oqaatigineqarsinnaanngilaq.

Tamatumunnga pissutaavoq Inatsisartut  
taamaallaat pisortat ingerlatsinerannik  
nakkutilliinermik taaneqartartoq  
ingerlattussaammassuk, taamalu  
nammineq inatsisiliornerinik allaffissornikkut  
aqutaqaratik.

Ataatsimiititaliat inatsisit naapertorlugit  
pilersinneqartussat ataatsimiititaliallu  
ataavartut Inatsisartunit pilersinneqartut,  
Inatsisartut Siulittaasoqarfiat ilanngullugu,  
akuttunngitsumik noqqaavigineqartarput  
ilanngussat atortussallu allat  
ataatsimiititaliamut  
siulittaasoqarfimmulluunniit  
ingerlatinneqarsimasut pillugit  
paasitinneqarnissamik kissaateqarnermik.

Paasissutissat tamakku akuttunngitsumik  
isertuussassaasarput imaluunniit suliamut  
aalajangersimasumut tunngatillugu  
allakkiaasarlutik isumaaruttussanik tamanut  
saqqummiunneqaralarunik.

Tamanna pissutigerpjarlugu  
siulittaasoqarfimmi ataatsimiititalianiluunniit

ataatsimiinnernit avammumut tamanut  
ammassumik issuaasoqqaqusaanngilaq.  
Malittarisassaq tamanna aamma  
Inatsisartut ataatsimiittarfianni,  
tusagassiorfinnut allatulluunniit atuuppoq,  
soorlu aamma imaqarniliat, ilanngussatut  
atortussat il.il. tamanut  
saqqummiunneqqaqusaaneq ajortut.

Taamaattorli siulittaasoqarfiup  
ataatsimiititalialluunniit  
aalajangersinnaavaat siumut  
aalajangersarneqareersumik tamanut  
nalunaaruteqartoqartarsinnaassasoq.

## INATSIARTUT PAASISSUTISSIISARNERAT

Inatsisartut suliaat pillugit ukiumoortumik  
nalunaarusiamik Inatsisartut ukiut tamaasa  
saqqummersitsisarput. Taamatuttaaq  
Siulittaasumit, Siulittaasoqarfimmit  
ataatsimiititalianillu tusagassiorfinnut  
nalunaarutinik ukioq kaajallallugu  
nassitsisoqartarpoq.

Katersuunnerup nalaani ataatsimiinnerni  
oqallinnerit internetikkut kiisalu KNR-ip  
nuna tamakkerlugu TV-kanaliatigut  
malinnaaffigineqarsinnaapput.